

Na osnovu člana 24. tačka b) Zakona o internoj reviziji institucija Bosne i Hercegovine ("Službeni glasnik BiH", br. 27/08 i 32/12) i čl. 33. i 34. stav (8) Programa obuke i certificiranja internih revizora u institucijama Bosne i Hercegovine ("Službeni glasnik BiH", br. 7/15), Centralna harmonizacijska jedinica Ministarstva finansija i trezora Bosne i Hercegovine donosi

ODLUKU
o načinu bodovanja, evidentiranja i izvještavanja o kontinuiranoj
profesionalnoj edukaciji internih revizora u institucijama Bosne i Hercegovine

Član 1.
(Predmet)

Odlukom o načinu bodovanja, evidentiranja i izvještavanja o kontinuiranoj profesionalnoj edukaciji internih revizora u institucijama Bosne i Hercegovine (u daljem tekstu: "Odluka"), u cilju provođenja člana 5. stav (1) tačka b) i stav (2) Zakona o internoj reviziji institucija Bosne i Hercegovine (u daljem tekstu: "Zakon") i odredaba Programa obuke i certificiranja internih revizora u institucijama Bosne i Hercegovine (u daljem tekstu: "Program"), definiše se način bodovanja, evidentiranja i izvještavanja o kontinuiranoj profesionalnoj edukaciji (u daljem tekstu: "KPE") internih revizora u institucijama BiH.

Član 2.
(Primjene odredaba)

Odredbe ove odluke primjenjuju se na rukovodioce jedinica interne revizije i interne revizore koji vrše funkciju interne revizije u organizacijama na koje se primjenjuje Zakon, a koje su obavezne uspostaviti internu reviziju na način propisan Odlukom o kriterijima za uspostavljanje jedinica interne revizije u institucijama Bosne i Hercegovine ("Službeni glasnik BiH", br. 49/12) i zaposlene u Centralnoj harmonizacijskoj jedinici Ministarstva finansija i trezora BiH (u daljem tekstu: "CHJ") koji rade na poslovima uspostavljanja i razvoja sistema i vršenja funkcije interne revizije u institucijama BiH (u daljem tekstu: "interni revizor").

Član 3.
(Obaveza KPE)

- (1) Interni revizor, kako bi održao nivo svoje stručnosti i kvalitet usluga koje pruža, te iste nastavio da razvija i nadograđuje kroz usvajanje novih znanja, obavezan je da se kontinuirano profesionalno educira u skladu sa Programom i ovom odlukom.
- (2) CHJ će internim revizorima dostaviti informacije o obukama iz oblasti KPE, koje bude organizovala samostalno ili u saradnji sa domaćim ili međunarodnim pružaocima usluga iz ove oblasti.
- (3) Rukovodilac jedinice interne revizije obavezan je planirati i pripremiti, na osnovu člana 11. stav (2) i člana 15. tač. k) i o) Zakona, a u skladu sa odredbama Programa i ove odluke, godišnji plan obuke internih revizora u jedinici interne revizije.
- (4) Ispunjavanje obaveze kontinuirane profesionalne edukacije internih revizora vrši se na osnovu obavljene KPE, koja se boduje na način definisan u članu 5. stav (2) ove odluke, i iskazuje zbirno na godišnjem nivou.

- (5) CHJ može, na zahtjev internog revizora, odobriti oslobađanje od obaveze KPE za određeni period ako za to postoji opravdan razlog (porodiljsko odsustvo, duže odsustvo zbog bolovanja, i sl.) o čemu izdaje akt s odgovarajućim obrazloženjem oslobađanja.

Član 4. (Prijavljivanje na obuke)

- (1) Interni revizor, u sklopu obavezne KPE, obavezan se prijavljivati na edukacije i usavršavanja iz oblasti KPE koju organizuje CHJ ili druge domaće i međunarodne organizacije u cilju unapređenja i usavršavanja svojih znanja i vještina, kao i realizacije planova obuke internih revizora.
- (2) Način prijavljivanja internih revizora na obuke iz KPE će biti detaljnije uređen u Uputstvu o KPE internih revizora u institucijama BiH.

Član 5. (Način bodovanja)

- (1) Interni revizor obavezan je da, u okviru KPE u toku jedne kalendarske godine, sakupi minimalno 40 bodova, od čega najmanje 10 bodova treba biti ostvareno po osnovu učešća na događajima koje organizuje, podržava, suorganizuje ili provodi CHJ, a koji su navedeni u stavu (2) ovog člana u tabelarnom pregledu pod rednim br: 2, 6. i 7.
- (2) Način bodovanja svake od vrsta KPE, koje su definisane u čl. 27. i 30. Programa, dato je u sljedećoj tabeli:

R. br.	Vrsta KPE	Predmet bodovanja	Broj bodova	Maksimalan broj bodova u jednoj kalendarskoj godini
1.	Vršenje interne revizije i pilot interne revizije po metodologiji CHJ	Jedan izvještaj	5	10
2.	Vršenje poslova instruktora, mentora i predavača u procesu sticanja zvanja Certificiranog internog revizora u institucijama BiH u skladu sa Programom	Jedan modul	10	10
3.	Učešće u izradi i razvoju propisa iz oblasti interne revizije i finansijskog upravljanja i kontrole iz nadležnosti CHJ	Učešće u izradi jednog propisa	5	10
4.	Sastavljanje periodičnih, <i>ad hoc</i> i godišnjih izvještaja jedinice interne revizije i Godišnjeg konsolidovanog izvještaja interne revizije	Jedan izvještaj	5	10
5.	Učešće u vršenju eksterne provjere kvaliteta rada interne revizije u svojstvu ocjenjivača	Jedna provjera	10	10
6.	Učešće na tematskim sastancima koje organizuje CHJ	Jedan sastanak	10	20
7.	Učešće na obukama koje organizuje CHJ i učešće na obukama koje podržava i suorganizuje CHJ u okviru projekata iz oblasti javnih finansija i PIFC-a (<i>Public Internal Financial Control</i>)	Jedna obuka – Aktivna KPE	10	10
		Jedna obuka – Pasivna KPE	5	15
8.	Učešće na obukama, konferencijama, seminarima, modulima, radionicama i drugim stručnim skupovima koje organizuju međunarodne i domaće institucije na teme iz člana 29. Programa	Jedna obuka – Aktivna KPE	10	10
		Jedna obuka – Pasivna KPE	5	15

9.	Učešće na obukama, konferencijama, seminarima, modulima, radionicama i drugim stručnim skupovima koje organizuju strukovna udruženja internih revizora u BiH sa kojima CHJ ima potpisane memorandume o saradnji, a koje su u skladu sa temama i oblastima KPE definisanim članom 29. Programa	Jedna obuka – Aktivna KPE	10	10
		Jedna obuka – Pasivna KPE	bodovanje u skladu sa stavom (4) ovog člana	
10.	Formalno stručno usavršavanje u vidu postdiplomskih magistarskih i doktorskih studija	U godini u kojoj je stečeno naučno zvanje	10	10
11.	Objavljivanje stručnih radova i članaka u stručnim časopisima, publikacijama i biltenima	Jedan tekst	5	10
12.	Učešće u studijskim posjetama koje imaju za cilj razmjenu iskustava u vezi sa temama iz člana 29. Programa	Jedna studijska posjeta	10	10
13.	Učešće na stručnim međunarodnim i domaćim konferencijama i skupovima vezanim za oblast interne revizije	Jedna obuka – Aktivna KPE	10	10
		Jedna obuka – Pasivna KPE	5	15
14.	Praćenje stručne literature i pretplata na stručne časopise	Stručna literatura/ stručni časopis	1	5

- (3) Rukovodilac jedinice interne revizije dostavlja CHJ zahtjev, pojedinačno za svaku od obuka, konferencija, seminara, modula, radionica i drugih stručnih skupova koje organizuju domaće i/ili međunarodne institucije, kako je to navedeno u stavu (2) ovog člana pod rednim br: 8, 9, 12. i 13, zajedno sa pratećom dokumentacijom, radi dobivanja mišljenja CHJ o ispunjavanju uslova za bodovanje.
- (4) Jedan sat edukacije internog revizora evidentiran kod strukovnih udruženja, sa kojima CHJ ima zaključen memorandum o saradnji, priznavat će se kao jedan bod KPE, u skladu sa ovom odlukom.

Član 6. (Evidencija i izvještavanje)

- (1) Rukovodilac jedinice interne revizije obavezan je da, u skladu sa članom 31. Programa, vodi evidenciju o KPE za jedinicu interne revizije i to pojedinačno za svakog internog revizora u jedinici interne revizije, kako je to definisano članom 5. ove odluke, i da CHJ dostavlja izvještaj o KPE internih revizora u jedinici interne revizije.
- (2) CHJ može, radi dobivanja potrebnih informacija o održanim KPE, stupiti u kontakt sa međunarodnim i domaćim institucijama koje organizuju pojedine vrste kontinuiranog usavršavanja, navedenim u članu 30. Programa i članu 5. Odluke.
- (3) CHJ će posebnim Uputstvom, u skladu sa Programom i ovom odlukom, detaljnije urediti način evidentiranja i izvještavanja o kontinuiranoj profesionalnoj edukaciji internih revizora u institucijama BiH.

Član 7.
(Stupanje na snagu)

- (1) Ova odluka stupa na snagu osmog dana od dana objavljivanja u "Službenom glasniku BiH", a primjenjivat će se od 01.01.2016. godine.
- (2) Odluka će biti objavljena i na web stranici Centralne harmonizacijske jedinice Ministarstva finansija i trezora BiH: www.mft.gov.ba.

Broj: 02-1-02-4-382-1/15
Sarajevo, 24.11.2015. godine

Direktor
Centralne harmonizacijske jedinice
Ministarstva finansija i trezora BiH
Ranko Šakota, v.r.